



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :



Tir Yimyim



tir_yimyim



tir yimyim

TAPAK 8

SCO senden nung adentsü
atema PM Modi China tonga ogo

Trump indang tariffs timba ozüng
alema lir: US Court of Appeals

VOL. XXII ISSUE NO. 317 (ADOK 317)

DIMAPUR

AMUNGNÜ SUNDAY

LUROI (AUGUST) 31, 2025

₹ 5.00

Osangbener Dip Saikia dak akhaba aitsür: HornbillTV

Dimapur, Luroi/August 30 (TYO): HornbillTV reporter Dip Saikia dak August 30, 2025 nikongdang Laii village, Senapati district, Manipur nung lia akhaba khukhua aitsür, ta HornbillTV sangdong ka ajanga ashi.

Osangbenertem ya nüburtem indang tenük aser tenarong ama lir, aser ochi temai adokdaksütsü asoshi aiben pei takum bendanga agütsür. Sobaliba sentong ka indang osang abenba mapang Saikia dak akhaba ya pa dak teka sangshiba kisüng masü saka asenoki wazüka ayuba press freedom aser democratic values dak jakdaka amakba lir, ta ashi.

Osangbener anema iba ama tashiyim mapa inyakba ya ochi obendang, transparency aser accountability metsünga-reta amshiba lokti ka nung maremzüktettsü aser mataloktsüla.

Region nung osangbener temi pei mapa inyakba mechi mapa

tamajung tali inyakba, aiben amokmerenba, merenshiba mesüra azüdokshiba atema süoki ia bilemer, ta HornbillTV ajanga ashi.

Government of Nagaland, Government of Manipur, ozüng amshirtem aser tapet ketdangsürtem dang iba mapa tamajung kanga junga bushisüngdangtsü ayongzüker. Mapa tamajung inyaker aser par den nisung kar danga alinungbo, parnok nem tekeraba nung obendang agüja osangbener anema mapa tamajung inyakba memerenshi metoktsütsü ta angatetdaksütsü ayongzüker.

HornbillTV-i Saikia'er kibong den tejashi lemsateper aser pa tekeraba nung taneptsü angutsü asoshi sarasademtsür. Democratic society ka nung azüdokshi ya menügdak, aser press freedom wazüka ayutsü ya state, civil society aser nüburtem arok teinyaktsü lir, ta HornbillTV sangdong ajanga ashi.

Osangbener dak akhaba aitsür: Mokokchung Times

Dimapur, Luroi/August 30 (TYO): Manipur nung Senapati district kübok Laii yimtsüing nung August 30, 2025 nikongdang nunglokja aliba mapa inyakdang HornbillTV reporter Dip Saikia dak akhaba atema süngmanger aser khukhua aitsür, ta Mokokchung Times sangdong ka ajanga ashi.

Osangbener dak mapa tamajung inyakba ya iba nisungba anema inyakba kiusüng masü saka freedom of press aser democratic values anema inyakba lir. Iba ama tatalokba yagi temulung nung anisüngzüker mangur aser osangbener temi pei mapa inyakba mapang timtem tali

ajuruba sayur, ta ashi.

Dip Saikia, par kibong aser HornbillTV nung külem tenzüker den onok nokdaka lir aser pa tekeraba nung taneptsü angutsü asoshi sarasademtsür. Onoki ketdangsürtem dang iba tatalokba indang-indanga aser kanga junga bushisüngdangter memonuli ochi obenang agütsütsü ajungshir, ta Mokokchung Times sangdong ajanga ashi.

Osangbener anema mapa tamajung inyaker asoshi democratic society nung talidak maka aser press freedom wazüka ayutsü ya state, civil society aser nüburtem arok mapa lir, ta sangdong ajangasa ashi.

Ao Lanur Telongjem-i Chief Secretary Sentianger den ajuruteper



Kohima nung Nagaland Chief Secretary indang kidang August 30, 2025 nü Ao Lanur Telongjem ketdangsür aser Chief Secretart Sentianger Imchen, IAS mensem ka amendang tangokba noksa nung angur.

Dimapur, Luroi/August 30 (TYO): Mokokchung, Dimapur, Chümoukedima, Nuiland aser Medziphema nungi Convener Imnaonen Pongen aser Co-convener Tia Longchar nati anir Ao Lanur Telongjem ketdangsür temi August 30, 2025 nü Nagaland Chief Secretary, Sentianger Imchen, IAS den par kidang ajuruteper liasü.

Tenüngsang agütsüba sentong tatsüka agiba mapang ALT Convener Imnaonen

Pongen-i, Chief Secretary Sentianger-i State sorkar nung tematiba bureaucratic menden ngua inyaktetbaji tarutsü putu atema tajungshiba tulu ka asütsü ta ashi.

Paisa Chief Secretary dang tetsübo makai Nagaland ajunga ajangzüksü atema maneni Naga nunger tenzüksü ayongzüka liasü.

ALT tenüng nung Convener-i Mokokchung indang canvas printing ka agütsü.

Ao Lanur Telongjem ajanga

pa semdangba atema CS Sentianger-i pelaba lemsateper aser State sorkar tenüng nung Nagaland atema tajungtiba inyaktsü ta ashi.

Kasa mapang pai tarutsü anogotem state tesem ajungalen terenlok asoshi nübür ajunga dang pa yaritsü ayongzüka liasü.

Iba senden nung ALT Treasurer Imkongmar Imchen, Advisors Imtiakum aser Anungba Sanglir nungeri Ao lanur tangatetba aser tejangraba lemsatepa liasü.

Konyak Union-i Mon district sadangtsü maneni akhanger

Dimapur, Luroi/August 30 (TYO): Konyak Union-i administrative district tasen ka yanglutsü mechi Mon district sadangtsü akhangba asendenshia Kohima nung August 29, 2025 nü Chief Minister Neiphiu Rio den senden ka amendang iba onük benoka liasü.

Honibarnü sangdong ka ajanga ashiba agi, Mon district nung administrative tsütsü

timtem tali akumba koktettsü asoshi district balaka yanglutsü sorkar dang ajungshiba shiti ka KU-i chief minister nem agüja liasü.

Ana kuma sadangba ajanga, talisa Tizit-Tiru-Naginimora border region nung yimsüsüba nung tajungba akumtsü aser nüburtem nung service tajungba agütsütsü, ta parnoki ashi.

Iba den külemi Konyak union-i sorkar dang Nagaland

Foothill Road project tekeraba nung renemtsü ajungshia lisü, koba ajanga Assam highways nung metaloka aliba Konyak nunger temi timtem ajuruba ajemba nung tongtipang lir.

Chief Minister Rio-i Konyak Union dang parnoki akhangba nung pa dena lir ta ashi aser parnoki tebilemstü lemsatepba mapa kuma inyaka aotsü asoshi nüngdakba mera agitsü nangzüka liasü.

NMSA-i Kohima nung sorkar telemtetba anema longkak ait

Kohima, Luroi/August 30 (TYO): Nagaland Medical Students' Association (NMSA) kübok Nagaland nungi medical aser allied health students temi Honibarnü Department of Health and Family Welfare office, Kohima kimalen yimjung nung longkak aita liasü.

Sorkari tatidang magie contract nung inyaka aliba health workers 280 regular kumdaksütsü mera agiba anema parnoki longkak ya aiter.

COVID mapang shimba Medical Officers, Dentist, Ayush practitioners aser nurses 280 tashi departmental screening committee ka ajanga regularize asütsü asoshi August 18, 2025 nü sangdongba nung langzüa iba longkak ya aiter.

Iba yagi Constitution nung mela aliba recruitment process



NMSA-i Kohima nung sorkar telemtetba anema longkak aitiba mapang tangokba noksa angur.

alemyir aser Nagaland Health Service Rules, 2006 nung aibelener, kong Class-I gazetted officer posts ajunga Nagaland Public Service Commission (NPSC) ajanga shimsü shia lir.

"Iba telemtetba yagi nübü tetemtsü tajungtiba shimba nung tetsükdaksü agütsür aser Constitution indang Article 14 aser 16 anema inyaker alitsü, kong ajak ozüng matsüngdak kasa aser public employment nung maongka kasa agütsütsü shia lir," ta NMSA tir Pito S. Rochill-i

longkak aitdang ashi.

Parnoki August 18 nü sangdong ya tangsa meyipa agitsü aser tarutsü nung health sectors nung appointments ajunga NPSC ajanga agitsü akhanger.

"Onoki COVID-19 mapang tenzüker anema masü. Saka regularization ya alitsü asünungbo, yimya shidak amshia open procedures ajanga alitsüla," ta NMSA tongti zülur Bonoto P. Zimo-i ashi.

Class-I atema written exam magitsü sorkari telemtetba agiba

yagi yimya tamajung sübadaksür, ta parnoki ashir. Nagaland Health Service Rules kübok iba ama posts asoshi nübü shimba ya noklang shilem NPSC ajanga inyakttsü shia lir ta ashir.

"Recruitment rules ya mamshitsü atema kechiba yanglu? Ibai tim masüba dang masü saka ozüng alema aser tapi agi inyakba lir," ta Rochill-i ashi.

Court obendang ka indang asüngdangba mapang, NMSA lenirtemi ashiba agi taoba mapang legal challenge ka court-i magizüki

liaka court-i department dang regularization asütsü totuyuba mesüra temelaba agüja mali.

Nüngdak dang süra parnoki okadaki aotsü ta ashi.

Department of Health and Family Welfare nungi yimjak nung telangzüba kecha agüja mali, saka regularization atema medical fitness tests aser interviews bo August 27 nü tenzükogo ta angazüker.

Interview agitsü asoshi anogo jelia memetetdaksü aser iba inyakyim ajunga nung ochimashi lir, ta NMSA lenirtemi ashi.

Parnoki civil society, kaketshir tentet, NGOs aser nüburtem dang parnoki ochi obendang akhangba nung adentsü ayongzüka liasü.

Iba totuyuba magien tashi onoki maneni longkak aittsü, ta NMSA tiri ashi.

HWC Longkong nung NQAS external assessment agi



Luroi/August 30, 2025 (TYO): HWC Longkong, Mokokchung NQAS external assessment August 30 nü agiogo.

NQAS external assessment lapokja CHO, HWC Longkong Matsungshila-i, züngsem ana agi kümtetba empaneled external assessors team nungi Dr. Rajeev Kumar (District Consultant Quality Assurance, Rohtas, Bihar) aser K. Dharani Devi (DPHNO, State Institute of Health & Family Welfare, Khanapara Guwahati, Assam) na den Dr. Imlinoba Changkiri DQM Dimapur, DHFW Kohima nungi facilitator, HWC

Longkong staff tem, Chairman VHC, yimdaklirtem aser Dr. Takosunep Ao, Dy. CMO Mokokchung-i anir Chief Medical Office staff tem pelashishia agizüka liasü.

Lai, power point presentation ka ajanga HWC Longkong indang metetdaksü, kong HWC Longkong infrastructure, nübu, inyakyim, takoktem, nukla aser mission densema liasü. Laisa, Arogo aser Longkong Village Council chairman-i ani nüburtemi teyari agütsüba ajanga health centre nung infrastructure renloka odar ta ashi.

Kasa mapang nung Dr. Rajeev Kumar aser K Dharani

nati NQAS assessment ya facility atema angazüksü maongka tajung ka aser iba ya inyakyimtem asadangba ka ama masü saka maongka ka ama agitsü ashi.

NQAS certification programme ya public health facility tem atema national quality certification tematiba lir, koba healthcare service jenjang tajungba kümdaktsütsü atema 2013 küm amenoka liasü. National quality assurance standard criteria ataloka inyakba sülen International Society for Quality in Healthcare (ISQua)-i kuli kaket ya agütsür.

Kuhuboto nung Nasha Mukta Bharat Abhiyaan campaign agi

Dimapur, Luroi/August 30 (TYO): Government High School, Kuhuboto, Niuland nung August 28 nü Nasha Mukta Bharat Abhiyaan campaign takok ngua agiogo. Temespba mozü achiba ajanga timtem adokdaksüba indang aser temespba mozü achiba nungi pila aliba lokti ka yangertsü atema tangazükba agütsütsü nükjidong nung iba sentong ayongzüka liasü.

Sentong nung SDO Civil Kuhuboto Nuhuta Tunyi-i lokti pela agizükba o jembiba mapang,

temespba mozü achiba anema raratsü atema longjemer inyaksü koda tongtibang iba indang lemsatepa liasü.

EAC Kelengunuo Solo-i, Nasha Mukta Bharat Abhiyaan indang metetdaksü aser paisa iba campaign & mission na nongita yaritsü atema tenangzüktepba agiba sentong achaayanga agia liasü.

Sentong nung o jembiba mapang Community Health Officer Tiala-i, temespba mozü achiba ajanga timtem tulu adokdaksüba indang lemsatep

asir iba campaign nung lokti-i shilem agitsü ajungshia liasü.

Sentong ya S. Boloka Jimo, Specialist in Financial Literacy lenisüba nung agi aser District Mission Coordinator Vily V Chophy-i tepela o jembir tembanga liasü.

Temespba mozü achiba nokdangtsü, iba indang tangazükba agütsütsü aser rehabilitation inyakyim ajungkettsü atema linük ajunga nung jenjang agiba nung shilem ka ama iba sentong ya ayongzüka agiogo.

Dimapur nung mejangjaba tasü mang ka nguteta lir

Dimapur, Luroi/August 30 (TYO): August 30 anepdang 7 ako shi nung NF Railway Dimapur Station Manager nungi mejangjaba tebur tasü mang ka DMV-RxR tsüngda KM-256/6-7 nung track line tema nung mepitaka aliba indang osang angazüka liasü.

Osang angazükba dak ajemdaker duty party iba

tesemi ilonga ao aser arishi küm 40 nungi 45 tsüngda asütsü ta bilemba mejangjaba non-local tebur ka sür lia nguteta liasü. Iba nisungba ya train agi tsükset asütsü ta bilemer.

Temzüng ozüng dak ajemdaker ken o ajak tembanga inyakba sülen tasü mang ya PM examination aser identification atema District Hospital Morgue-i bener ogo.

Asüsang yagi anüng sentsü half short, pant tanak, aut sentsü tola semer liasü. Pa terprangtsü tanak lir.

Ken o dak sendakba nung asüsanger kinunger, adianu aser medemertem dang Officer-in-Charge, Govt. Railway Police Station, Dimapur. (Mobile No. 7085055021) den t o n g t e p r a t e p t s ü metetdaksüogo.



Dimapur District Citizens' Forum (DDCF) ketdangpurtem menden melentepba sentong August 29 nü Lhomithi Colony nung DDCF Office tasenba nung advisor aser executive matsündang agiogo.

CM Rio-i asükhu lemsatep

Dimapur, Luroi/August 30 (TYO): Advisor to the Government of Nagaland Kudecho Khamo tetsür Nühüsolü Khamo August 29 nü Dimapur nung asüba osang angazüka mang ayimba Nagaland Chief Minister Dr. Neiphiu Rio-i sangdong ka ajanga lemsatepogo.

Nühüsolü ya tashi tait, temeim agi sünga aliba aser tamang takang tetsür ka liasü. La bendanga agütsüba kinungtsü, tetsü aser otsüla ka liasü, shibai tia tensa ajak ajanga lar kibong metoktsüi nokdakogo. La kinungbo asüba sülen la kijai lar tanurtem tasü ita aser aremzüka anitetogo aser parnok khuret angatetba senso tajung kaka kümogo. Lai Tsüngrem dak tamang ayuba, la tesunep tanüla aser la taküm bendanga

agütsüba ajanga lar tanurtem mulung nung ajemalu, temeim aser aremzüka tanen makai inyaksüba tanüla apuoktsüogo, ta CM-i ashi.

La asüba ajanga toktsüba tawa ya süngdaktsütsü makoktsü, saka lai la taküm kanga junga litetba atema Tsüngrem nem tenüngsang agütsür, koba ajanga la meteta alirtem maneni ajungmesotsü.

Mangyim jashi nung aliba mapang ozü kibongi Kudecho Khamo aser par kinungertem den asükhu lemsateper. Tulusang Tsüngremi nenok nem tashi, anisüngzüc aser tasütait tanüla agüjang ta aser asür tanüla teti tatem makadak anisüngzükdakjang ta sarasademtsür, ta CM-isa metetdaksü.

Director General, ATI-i NCS (probationers) 2024 Batch den sensak asem



Dimapur, Luroi/August 30 (TYO): Director General, ATI-i, August 30 nü Administrative Training Institute nung Nagaland Civil Service (Probationers) 2024 Batch den sensaksemogo. Nagaland Civil Service (Probationers) 2024 Batch nung parnok 16 ya 2024 küm November ita nungi ATI nung küm ka atema Civil Service Probationers Foundation Course agia liasü.

Parnok tawa District Training shilem tanabuba tembangogo aser study tour nung shilem ka ama Institute of Management in Government, Kerala; Netaji Subhas Administrative Training Institute, West Bengal; aser State Institute of Public Administration and Rural Development (SIPARD), Tripura ta linük nung Institute asem semdangtsü lir.

Probationer tem den sensaksemba mapang Director General-i, shisaluyim nung parnok jenjang kanga junga aliba atema tenüngsang agütsü aser tawa District Training dak ajemdaker parnok tajangshibatem lemsateptsü asüngdanga liasü. Paisa, ken o balala sensaksemba mapang ken o bentettsüba dak rangloker

inyaktsüla ta ashi.

Sensaksem mapang, state nung lanurtem mapa inyaksü asoshi maongka tali agütsütsüba, scheme balala tajungba benoka inyaksü atema line department aser district administration na sendaktepa inyaksü akangshitsü aser district lenla ajak nung kanga junga yimsü asütsüba amala onük benoka sensaksemba liasü.

Probationer temi, yimsüsüba nung technology tasentem amshitsü, nüburtem ajangzükdaktsütsü atema kinük nung aliba tesemtem nung power aser water infrastructure tajungba küma yanglushitsütsü nüngdakba lemsatepa liasü.

Pa tajangshiba lemsatepba mapang Director General-i, temzüng ozüng aziüokba, terenlok maparen, ali dak sendakba ken o, lendong timtem mapang inyakyimtem achaayanga, election agiba aser electoral rolls lepa reprangshiba amala district administration-i achaayanga tongtibang inyakyimtem indang metetdaksü.

Sentong nung Imlibenla Jamir, Deputy Director, Peter Konyak, Lecturer, aser Dr. A Alem W Longchar, Assistant Director nungera densema liasü.

METONGSHITSÜR :

Tir Yimiyim adok August 30, 2025 tapak 2 nung Mopungchuket Arogo osang adoka aliba nung "Mupungchuket" ta alibaji Mopungchuket ta metongshitsür aser " küm 150 ajungba " ta alibaji küm 125 ajungba ta metongshia züngdaktsüner. Aibelenba atema kangasa sasar.

- Yimozülur.

SCO senden nung adentsü atema PM Modi China tonga ogo



August 30, 2025 nü Ato kilonser, Narendra Modi Japan nungi tayimtsü ajanga China-i apusoa aotsü lia tangokba noksa nung angur.

New Delhi, Luroi/August 30 (Agencies): Küm tenet tejaklen Ato kilonser, Narendra Modi-i China semdangba sülen tang mezüing anogo ananü atema pai iba linük semdang.

August 31 aser September 1 anogotem nung Tianjin yimti nung Shanghai Cooperation Organisation (SCO) senden amentsü renemba mapang Modi China tonga ogo.

SCO senden nung Modi-i züngsem 10 aliba telok nungi lenirtem den külemi shilem agitsü. SCO senden nung regional security atema amalitepa inyaksü asoshi jembitsü.

Modi-i China Tir Xi Jinping ajurua jurila senden amenba ajanga India-China tsüngda tesendaktep ano tajungba akümtsü imlar.

India aser US na tsüngda

tesendaktep mejungi akümba mapang ka nung Modi-i China semdangtsü aliba ya kanga tongtibang lir.

Trump administration-i India nung osettsüset nung saru shilem aika atuba sülen New Delhi aser Washington na tsüngda mangatettep tali adokogo. India-i US den tesendaktep junga ayutsüji tongtibang ajisüaka India-i China den lenla balala nung lenmang tasen lapoktsü atema-a maongka bushir.

2020 küm Galwan Valley nung India aser China sepaitem tsüngda rara adokba sülen linük ana tesendaktep mejungi aküm. Ajisüaka Russia kübok Kazan nung Ato kilonser Modi aser China Tir Xi na senden amenba sülen linük ana tsüngda tesendaktep tajungba kümogo.

Mangatettep aika liaka China

ya India atema shishilembaba partner tulutibatem rongnung tanabuba lir. Aji oda China den tesendaktep junga alitsüji kanga nüngdak.

China atema-a India den tesendaktep tajungba küma yanglushiba ajanga US leniba nung region nung mitba maparen ajema kümdaktsütsü asoshi asalentong tsütsü tajangzük angutsü akok. Ano külen, anüolen linüktem aser China na tsüngda tesendaktep junga alitsüji India nung foreign policy nung tongtibang shilem ka lir.

India-i SCO summit nung shilem agiba aser China nung tongti ketdangsertem den senden amenba ajanga telemsa maneni adokba lima ka nung India-i linüktem tsüngda amalitepa inyaksü atema bendanga agüja inyakba sayur.

India nunger sen ano tajemba akümer; Dollar 1 ji Rupee 88 kümogo

New Delhi, August 30 (Agencies): Hokolbarnü Indian nunger rupee sen jenjang ano tajemba küma dollar sen 1 ji India nunger rupee bo 88 kümogo.

India nunger sen jenjang ano tajemba akümba sülen social media nung tejen tweets aser video aika asentenshir temai adoka lemsateper.

Social media amshirtem tejen tweet aika lemsatep. Item tweets rongnung kaji- tang Union finance minister, Nirmala Sitharaman opposition nung aliba mapang aser 2013 küm dollar 1 ji India nunger rupee 62 akümba mapang nung lai, "Rupee tashimaitba akümer, iba

ya tebilemtsü onük ka lir" ta metetdakja liasü.

Nisung kati ibaji lemsatepa, "Tang \$1 ji ? 88.22 kümogo. Ajisüaka osangbenertem senden mayongzüker, tebilemtsü makar, longkak maiter," ta metetdaktsü.

Ato kilonser Narendra Modi-i 2013 küm UPA sorkar aija, "Rupee ICU nung lir" ta lemsatepa liasü. Ibaji tweet ji lemsatepa nisung kati, "Iba tweet lemsatepba sülen küm 12 jungogo. Modi sorkar kübok Tajung Anogotem küm 11 sülen tang Rupee ventilator nung lir," ta ashi.

Manmohan Singh-i aniba sorkar mapang nung dollar 1 ji

rupee 50 akümdanga Modi-i aija liasü. Iba dak sendakba nung nisung kati, "Rupee 50 akümba mapang nung iba nisungba yagi maneni tejashi lemsatepa liasü. Tangbo pa kong lir?" ta asüngdang.

2013 küm Yoga tesayur Baba Ramdev-ibo rupee jenjang mejungi akümba atema Congress anema ken o benoka liasü.

Sri Sri Ravi Shankar-ia, Modi sorkar arura dollar 1 ji rupee 40 akümtsü, ta jembia liasü. Iba dak sendakba nung social media amshir kati, "Pa tenüng nung 'Sri' kwiben amshidir yamaji rupee 45 bendenloker," ta ashi.

Opposition-i yimsüsüba state 8-i GST saru ajemtsü akhanger

New Delhi, August 30 (Agencies): Opposition-i aniba sorkar aliba state temi GST saru shilem ajema kümdaktsütsü asoshi takhangba agütsübaji onoki pusemer, iba denji külemi consumer tem nem tajangzük agütsütsü atema inyakyim ka benoktsüla, ta Honibarnü Congress Party lenir Jairam Ramesh-i metetdaktsü.

Paisa, taruba hopta amentsü aliba GST Council senden ya (Narendra) Modi sorkar atema tongtibang osang ka kümdaktsütsü, ta ashi.

Ramesh-i ashiba agi, opposition sorkar aliba state ti-i küm pongu atema state ajak nem senotsü temenok agütsütsü atema takhangba agütsüogo.

Parnokisa moko chiyungtsütem aser jenjang tasak osettsüsettem nung saru lateta aliba shilem 40 dang nungi tali agibaji state tem nem agüjang ta takhangba agütsü.

Opposition sorkar aliba state 8- Karnataka, Himachal Pradesh, Jharkhand, Kerala, Punjab, Tamil Nadu, Telangana aser West Bengal state tem nung GST saru shilem ajema kümdaktsütsü aser parnok sasa mass consumption items rates ajemtsütsü asoshi pusema metetdaktsüogo, ta Congress general secretary in-charge of communications, Ramesh-i X ajanga metetdaktsü.

Paisa, state 8 jagi sorkar

dang saru ajemba ajanga consumers nem tajangzük agütsütsü asoshi inyakyim ka benoktsü takhangba agütsü, ta metetdaktsü.

Congress lenir-i, item takhangbatem agütsüba ya tim dang aser item takhangba ya tawa Union Finance Ministry kübok National Institute of Public Finance and Policy (NIPFP) ajanga adokba kaketterem nung ajemdaker lir, ta shisem.

Congress-i state ajak temeden kümzüka ayutsü atema jembia arudar, ta pai ashi.

"Taruba hopta ayonga aliba GST Council senden ya (Narendra) Modi sorkar atema tongtibang osang ka kümdaktsütsü. Ajisüaka iba ya chichiba tanela aser tezüluba naprongla nung cooperative federalism tejakleni odaktsüba maparen ka südaktsütsüla," ta pai ashi.

Union Finance Minister Nirmala Sitharaman-i aniba high powered GST Council senden September 3-4 anogotem nung amentsü aser iba senden nungji saru shilem ana dang lemsar agitsü atema jembitsü.

Centre dak alia states aser Union Territories ajak nungi finance minister tem densema aliba council nungji GoMs asema compensation cess aser health & life insurance atema benokba onüktem benoka o lemteptsü.

J&K nung anentsüh lendong nung nisung 7 asü

New Delhi, August 30 (Agencies): Honibarnü Jammu & Kashmir nung Reasi district kübok Mahore area nung anentsüh alua ki ka rembangba lendong nung kibong ka nungi nisung tenet süogo, ta ketdangsertemi metetdaktsü.

Honibarnü Mahore area kübok Badder yimdaq tzünglu kanga aruba sülen anentsüh alua liasü. Iba lendong nung samaba kibong züngsemtemji tang tebushidak.

Anentsüh lendong nungji ki kibur Nazir Ahmad aser pa kinüngtsü na den jabaso pongu samaogo, aser parnok ajakji süadoker asütsü, ta bilemer.

Honibarnep J&K kübok Ramban district kübok Rajgad area nunga tzünglu kanga sashia

aruba sülen tzümetsüng lendong nung adianu ana densema nisung pezü asü aser nisung ka samaogo, ta ketdangsertemi metetdaktsü.

District headquarters nungi kilometer 25 shi pilar aliba Rajgarh nunga tzümetsüng lendong nung asür tetsür ana densema tasü mang asem ngutetogo.

IMD-i Jammu & Kashmir nung August 30 nungi September 2 tashi tzünglu kanga arutsü, ta tekümdangtsü osang metetdakja lir.

IMD-isa taruba anogo pezünü Ladakh, Gilgit-Baltistan, Muzaffarabad aser Uttarakhand nunga tzünglu kanga arutsü, ta metetdaktsüogo.



August 30, 2025 nü Prayagraj nung tzü metsünga alidak tasü mang ka apur aoba noksa nung angur. Ganga ayong nung tzü tali mobanga ayimba ajanga yimti aika nung tzü metsünga lir.

PUBLIC DANG SANGDONGER		
Nüburtem dang ya sangdonger, Bank of Baroda, Circular Road, Dimapur, Nagaland-i tsünglanglen Mrs. Wurhothsu Nyuthe tenüng nung aliba kiojen ya M/s. Naga Poultry Farm Proprietor ama la nem credit/loan facility agütsütsü asoshi security ama agitsü tebilemba lir. Tsünglanglen shia aliba kiojen ya nisung kari danga parnok meyong ta shira anogo 10 tsüngda kuli tejangja bener Bank matsüngdangi arutsü metetdaktsür. Anogo 10 tsüngda telangzüba kecha melira iba kiojen atema tashishitsü kecha mali, ta züngshia Bank-i 'mortgage' asütsü atema inyaksangshitsü. Kiojen osang tejangja: Nihoto Village, Nuiland, Nagaland nung Local Patta No. 2280, Dated: 27.03.2025 nung ali tasazük 1,72,515 Sq. Ft. Bounded By:- North: Er. Inatoho, East: Highway, South: Approach Road, West: Nagamese Church.		
Sd/- (Trilochan Sahoo) Chief Manager Mob- 9366501739 Date: 30-08-2025	Sd/- (Haihangrang E H Newme) Empanelled Advocate Mob- 9402237781	



TIR YIMYIM YIMOBILEM (EDITORIAL)

DIMAPUR SUNDAY, AUGUST (LUROI) 31, 2025

Sarasademer saka mamanger!

Asenok atema nungdak ka Chief ministerba ket nung lir saka pai magütsütsü ta metetsümonga pa dangi orr asüngdangtsü asü ? Mesüra Chief ministerbai asen ki tonga arur asenok nungdak kechisa pa dang meshidir agütsütsü ta nangzüker oaka, pai magütsütsü südi ta bilema oa meshir asü ? Yamaji ka mesüka asenoki aiben Tsüngrem dang asüngdang. Atangji, asenoki Tsüngrem dak amanger saka Pai asenoki asüngdangba magütsütsü ta bilemer. Asenoki sarasademer saka asenoki sarasadembaji mataloktsü ta bilemer. Asenoki Tsüngrem dang asenok nungdak meshia sarasademer aser kodang ibaji ataloker asenoki mamanger. Ibaji Tsüngrem tsüngdang kanga tezüdangtsüka lir. Ajisüaka, Tsüngremji temeim lir(1 John 4:8). Iba temeim aser taochi jagi asenoki mamangjaika sarasademyonga asenok nungdak meteta Pai agütsür. Asenoki Tsüngremi asen sarasademba langzütsü ta kenyonji meimlaika sarasademer saka Temeim Tsüngremi asenok mamangba purtemi sarasademba langzür. Iba taochi aser taremzüki tesüngmangtsüka lir. Asenoki tebang agi Tsüngrem dang sarasademer saka temulungibo mamanger. Tsüngrem tsüngdang ibaji koda tesempatsüka. Aseni asübo kanga artsütsütsü aser merenshitsü langa lir. Ajisüaka, Tsüngremi asenok aochibayong anogo shia asenoki Pa dak mamangaka Pai asen nungdak peritsür. Asenoki dang asüngdangra, asenoki tamakoktsü ama bilema aliba teblemstütem to Tsüngremi melamelaa inyaktsür. Ken mapang ka tenyar Peter tepuokdak puoka liasü. (Tenyar Mapa 12). Idangji tenyar Yohan tedi Yakob-bo Herod chubai nok agi lepsetdaksür liasü. Aji oda, Peter chiokdaksütsüsa nisung shinga dak tashi mali asü. Memenui Yakob ama paa lepseta endoktsü mapang ka tonga arur amai liasü. Iba mapang nung Yirusalem nung Tsüngrem dak amangertemi ki ka nung longjemmer sarasadem. Parnoka dena sepaitemi arua pua bener aotsü tsübuba agi ki telong nung shibanga yur sarasadem. Parnok sarasadem tesüdak nung Tsüngremi indangjisa parnok sarasademba langzü aser kotak tenyar ka yoka Peter tepuokdak nungi anitet. Peter tepuokdak nungi chiokang ta tamangertem kar Yohan shiba dang Mark ta aja, pa tetsü Mari-er kidangi sarasadem tesüdak nung Peter tepuokdak nungi arur par kishi nungji akoshitsü. Parnoki chiokang ta Tsüngrem dang sarasademba Peter to parnok sarasademba ki kishi züng nung asangsang nokdaka liasü, saka parnoki paji Peter a ta mamang, kechiyong parnoki sarasademaka Peter to tepuokdak nungi chioktsü ta mamang. Asenoki tebang agi sarasademba o temulung agi amangba na tetsüngdaji ibaji lir. Parnoki sarasadem nungji Tsüngremi Peter-bo chiokdaksü saka Peter chiokang ta sarasademertemi Peter arua parnok kishizüng nung akoshia nokdaksangji tanüla a ta bilem. Peter arua kishizüng nung nokdaka angulajiang yiamatar ta bilem. Asenoki sarasademer saka Tsüngrem dakbo mangmanger ta asüba temulungjangji Tsüngrem tsüngdang taaktsüka lir. Asenoki sarasademba Tsüngremi langzüba asenoki ngur mamangbaji aser süngmanga bilembaji asenok kechi atema sarasademer asenoki ibaji agizüktsü asenok temulungjang merenemba ajanga lir. Asenoki Tsüngrem dang asendenshi tulu yokang ta sarasademer saka asendenshi arutsüba lenmang asenoki merenemer, asenoki Tsüngrem dang taidokang ta sarasademer saka asenok mulungjangbo taitüba agi sünga lir, asenoki asenok nungdak meshia sarasademer saka asen mulungjang nung shisabolubo manener. Item jagi asenok kangshir. Tsüngrem dak noklang shilem nung noklang mulung alemtsüsa asenok tamang ulushitsü kanga nungdaker. Tsüngrem taochi agi, asenoki Pa dak junga mamangaka, Pai asen sarasadembo teti langzür, saka asenoki Pa dak dang amanga melitetba jagi asenok pelaa alitsü melen, shisabolua dang alir. Tsüngrem dang asenok tamang ulushijang ta asüngdanga tanübo ano ken sarasademdi.

OLEMSABANG

SHIDAKBA MELENSHITSÜLA

~ M. Meren, Ex.pastor.

(Yashi adok nungi...)

2024 December 25 Christmas mapang ka nung adianutsür ka tenüng agi Tsatingla Sangtem lai angashiba Dimapur nung Naga nunger ka Homeless kümer meshimetsüa senzüdaki ta angashia lai la mulung nung paji bushia yaritsü mulungtet aser anogo ka piyong paji bushia senzü aser tesü Train station nung paji ajurua lar dangi anir ao, aser hapta ka piyong mesüa yaria süoshi tajung alia semtsür tekolak ku junga mejeptsür aser pa taküm mesütsü asoshi youtube chanel ka lapoktsür taküm tasen ka yanglutsür yokba Global window ajanga perokshiba ngua kanga dang temulung chia reprangogo. Tanü Arogotemi yamaji inyaktsü asoshi aji Arogo teinyaktsü mapa masü ta bilemer no?

17 century ka nung London nung Salvation Army koba Christian teloktashi tait ka liasü, parnok Deobar sentep agiba ki ka nung Christian telok tulu ka oda nütsüng 1500 shi sentepa liasü, iba mapang nung London nung yi ajemer telok tuluka sentep jagi nungpoka ait, kishinükeri nokdangaka makok parnok 40 ait aser sentep tagidak nung tesüngmangtsü asayamenüja kolotep, sentep anishir jilo yija menütsü aser Damasa asayameso, anungji sentep anishiri tanemi toktsü aser sentepji senshia ao tajungba asütsü ta bangjemtep, saka parnokji asaya manener aser tsüngsangtep aser Salvation Army sobutsüji toyua menütsüli ta asayatep, idangji Salvation Army nung atenba tetsür chanu tila ka nokdak aser pai ola tila agi ken ka Long aser tenemtem ajaki jena aotsü ta iba kenji ola tilaji tanem tanemi atandang samara telok tsüngsangba ken ajakji olaji metangoktsü aser Lung aser tenemtem ajaki jena aotsü, iba anogo asoshi na atema jenokdak ka tenüngdaksü ta iba kenji lephsia aten, idangji samaro tazü nisungtemji mekorai aküm aser parnoki sema aliba korang ajakji semzüka ayu, aser idangji lai Laishiba tekong ka lapoka azüng lai "Ochishir pur tasüba ama ni südakjang, kü tatembang parnok ama lidakjang, iba lai nungi lai minute 40 jembi aser idangji senteper 1500 ola kata matoki pua aküm, aser tatem nung lai ashi, shirnoki mulungbensa Tsüngrem bushiner aser temeshi taküm ka alitsü mulunger arung ta tajaba agütsüdang samaro rong nung tanishiba mulungbensa nia ka kümner ta shia tejakleni ao, aser idangji pa sülen anidaker par telok ajak pa sülen mizü sabangi ao. Tetsür chanu ka yamaji tasü ita tamajunger telok rongnung inyaktetbaji la tasü aitbaji dang masü saka tanüla tarongba temalen nungi aruba agizükba ajanga yamaji inyaktet. Tanü Aoli Arogoi yamaji inyaktsü Ao Arogo temulung meyipa temalen nungi ain agizüktsüla.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Khristan school ka nung education ketdangser ka dak teka sangshi



August 30, 2025: Taoba hopta Uttar Pradesh kübok Dabra yimdak Khristan school ka mita reprangdang Hindu telok ka nungi züngsemtemi Education Department nung Block Resource Coordinator (BRC) dak teka sangshi. Iba school nungji tanurtem Khristan yimsü dangi meyipdaksür, ta tai tonglokja aliba ken o nung ajemdaker BRC, Vivek Chaukotiya-i Madrasa Road nung aliba Nava Kanthi School-i ao. Pai school mita reprangba mapang nung Vishwa Hindu Parishad (VHP) aser Bajrang Dal teloktem nungi züngsemtem-a liasü. Iba mapang nungji Bajrang Dal nung city coordinator, Jai Modi-i sorkar ketdangser, Chaukotiya dak ain adoka maaoktsü. Hindu teloktemi school campus nungji Khristan yimsü dak sendakba osettem angu, ta tai tongloktsü aser student records nung mangatettep aliba kuli agütsü. SC-ST Act kübok Jai Modi aser Sandeep Sharma na anema sorkar mapa inyakdang tetsükdaksü agütsüba atema ketdangsertemi ken o ka benokogo. Iba tatalokba nung shilem agir tanga Bajrang Dal inyakerkem densema tena police station-i anir ao. Nava Kanthi School ya Abraham Kanthilal Pallikonda-i 2002 küm tentetba telok lir. Machilipatnam, South India nung amenoka aliba iba telok yagi Andhra Pradesh, Uttar Pradesh, Madhya Pradesh, Bihar, Himachal Pradesh aser Haryana densema state trok nung mapa inyaker. Nava Kanthi-i shisaliok, skill development aser income generation atema tanurtem, lanurtem aser tetsürtem asoshi literacy programmes ayongzüka katsür. Iba telok yagi Madhya Pradesh, Uttar Pradesh aser Bihar nung school pezü tentetja yimtsüngtem aser sensaker tanurtem nem jenjang dalang agi shisaliok agütsür.

Sudan linük nung Khristan pongu apu

August 30, 2025: August 16, 2025 nü North Khartoum, Sudan nung police-i South Sudan nung Khristan pongu aputsü atema asüpila sarasadem sentong ka anendakja liasü, ta Arogo lenirtemi metetdaksü. Sudan Presbyterian Church nung Pastor, Peter Perpeny aser Khristan pezü North Khartoum, East Nile District kübok El-Haj Yousif tesem nung apu, ta Arogo lenir kati ashi. Khristantemji ozüng alema arur bendangertem, ta shia parnok apu. Civil war agi raksatsüba linük nung ketdangsertemi tan ita tetenzüklen nungi bendangerte m aridoktsü mesüra tashiyim agi meindoktsü atema nükjidong yur inyaker. Khristantemji Omdurman Jail-i anir ogo. Police-i apuba Khristantem rongnung tetsür ka dang Sudan nung sen 600,000 (\$995 USD) agütsütsüla mesüra ita trok tepoukdak alitsü ta shiogo, aser iba ya süpokrem amai lir, ta Arogo lenirisa metetdaksü. April 2023 nung Sudan nung civil war adokba ajanga Sudan nung tensa tamajungba aküm. Sudan nung Khristanpur tepsetba, shibelenba aser Khristantem kiojen aser shishilembadak amakba tatalokba aika lir, ta Open Doors 2025 World Watch List (WWL) report ajanga metetdaksü. Sudan nung Khristantem anema inyaker, Tenla kitem amaker, rakzükrakter aser kiojen rakzüka agir, ta kasa osang ajanga metetdaksü. RSF o SAF naprong ya Islamic telok lir. Parnok tsüngda raraba mapang nung Sudan nung Khristantemi telok ka mesüra ka pusemer ta tai tonglokja Khristantem apur. October 2021 nü sorkar yimsüsüba atsüngdoker mitkar yimsüsüba kübok Khartoum aser tanga tesemtem nung civilian meyirjang aika tepsetogo aser Sudan telung nung nisung million 11.9 dak tema jenshia lir, ta U.N. Commissioner for Human Rights (U N C H R) - i metetdaksü. Alima nung Khristantem alitsü atema linük tamajungtiba 50 rongnung Sudan ya jenjang 5buba nung lir (Open Doors 2025 World Watch List). US State Department-i 1999 nungi 2018 küm tashi Sudan ya CPC nung züngoka liasü aser 2020 küm Special Watch List nungi agien. Sudan nung Khristan nütsüng million 2 shi lir.

ANOGO ABEN TSÜNGREM DEN

KIBUBA DANG ATADI
"Ya shibai ashi, asenoki meteta lir, "Mangyangba kü meyong Ni shia agütsütsü." Aser ano, "Kibubai pei nubur o bendangtsü." Ibri 10:30

Meimchir ajak dak keta aliba tashi mait shisatsü kaji mang ayangtsü bilemba ya lir. Iba nung jangra-ateмба aser pelabaji mulungsü mapa ama aikati jangrar. Saka Tsungrem oi ashir ibaji temenen. Kechiyong mangyangba ya tai metoktetba, maremzüktetba mapa ka asünung iba yagi Tsüngremi yangluba meimchir aser kechisarina ajak madak takoksa, teraksatsüba aser tesamatsüba bener arutsür. Mangyangba kü meyong ni shia agütsütsü, ta ashiba ya asenibo aibelenaka asen dangbo kecha mashitsü saka asen anemer dangbo pai asen tebo küma mang yangtsütsü ta ashiba o masü. Saka pai asen danga küsaji inyaktsü. Kechiyong pai shiogo ni shia agütsütsü. Tetezü pa mangyangba nungi ana jenbua mali. Temeim adianutem, Kibubai pei nübur o bendangtsü ta ashibaji Tsüngremer obendangji shingaia paitoktsü makok. Temeshipura süang, temenenpura süang ajak Kibuba obendangba matsüngdang nokdaksü, iba ajangaji dang pei temeten angutsü. Kibubai inyaktsü mapa aseni inyakatokra pai asen aitsütsü. Pai asen dak nungi akangbaji tatok agütsütetba takümji südaktsüner. Aseni asen dak aliba mangyangba shisatsüji temeim aser tatok agütsüba shisatsü agi melendaktsüdi. Kechiaser taküm kuli tajungtibaji ibaji lir.

SBC nung missionary lenir, R. Keith Parks süadokogo

August 29, 2025: SBC nung mapang talangka missionary lenir inyaksang, R. Keith Parks alima nungi pilaogo; pa arrshi küm 97 liasü. Southern Baptist Convention (SBC) atema mission balala nung mapang talangka inyaker missionary, R. Keith Parks asüba osangji SBC International Mission Board-i sangdonga liasü. Pa kinüngtsü, Helen Jean aser jala Eloise nabo 2021 küm süadok. IMB Tir Paul Chitwood-i, Parks aser pa kinüngtsü nati küm aika Southern Baptists tenzüksü atema pei taküm bendanga agütsüba ajanga onoki nüburtem dangi Khrista osangtajung bener aotsü asoshi cooperative mission tenzü, ta metetdaksü. Taoba mapang SBC Tir aser taoba mapang Cross Church of Arkansas nung senior pastor Ronnie Floyd-i social media ajanga mangyim jashi lemsatep. "Ni Dr. Parks-i sayutsüngiba anganüa liasü. Lanur Pastor ka ama SBC nung pai jembiba otem ni angaa liasü aser aonung piyong missions tajaba atema shisadanga liasü," ta Floyd-i twitter ajanga metetdaksü. "Pa atema Tsüngrem tenüng asanger. Memphis, Texas nung asosang Parks küm 45 tashi international mission nung liasü. Pa mezüng Colombia nung student summer missionary ka ama inyak. 1954 nungi 1968 tashi pai mapa tajung inyakbatemji kanga tongtibang liasü," ta paisa metetdaksü. Pa 1980 nungi 1992 küm tashi Southern Baptist Foreign Mission Board (FMB) nung Tir inyak, aser tangbo iba dang ya International Mission Board ta ajar. 1992 küm FMB Tir mapa nungi anenba sülen pa Cooperative Baptist Fellowship atema mezüng missions coordinator aküm aser 1999 tashi inyak. Tawa CBF Executive Director Paul Baxley-i, Parks-i pa taküm piyong alima ajunga nung Yisu Khrista mission atema kanga bendanga agüja liasü ta metetdakja liasü. CBF Global Missions tentetba nung pai mangdang agütsü. Pai ajangshibatem, missiology aser asalentongtem ajanga ozü fellowship-i global missions nung shilem agitsü asoshi tashi tait tamendakdak ka yanglu, ta Baxley-i tan hopta tetenzüklen metetdakja liasü.

AO OSHI ANGAZÜKDAK:**TANÜ ANGAZÜKTSÜBA OJANG****Tetemsü**

(adj) tajung aser tapet, tashishitsü maket (qualified, worthy)

* Tetemsü nisungi yimsü asü dang nübortem ajangzüker.

Tetenlaba

(n) angati agütsüba, Tsüngrem nem agütsüba (offer, sacrifice)

* Tetenlaba shitak agütsüba agi Tsüngrem pelar.



Tir Yimyim

OLONG PAITEP # 7256

1				2				3		4
5		6								
							7			
8										
										9
		10				11				
				12				13		
14										
						15				
16										

TIPIEN

2. Auonungchiyongsüasenba

-(7)

5. Mangyimba mapang

-(5)

7. O tamendakdak

-(4)

8. Peidak malangba

-(7)

10. Juli

-(7)

12. Sen ayudak

-(7)

14. Tenük agi ajitet

-(4)

15. Tamajung aküm

-(5)

16. Apuso

-(7)

LANGTSÜNGLEN

1. Lenmang

-(7)

2. Aor kidong ka tenüng

-(6)

3. Tenarong maten

-(6)

4. A _ _ _ g

-(3)

6. Mopung apodoka

-(3)

ola adokdaksüba

-(7)

9. Tongtipang tagitsü

-(6)

10. Menungra bilem

-(6)

11. Aiür

-(6)

13. S _ _ _ k

-(3)

14. T _ _ _ r

-(3)

OLONG PAITEP # 7255 TELANGZÜBA**IPIEN :**

2. Warak, 6. Miim, 8. Asen,

9. Ongken, 11. Aanak,

12. Anbepong 13. Menü, 14. Kisen,

16. Posü, 17. Küra, 18. Inyak

LANGTSÜNGLEN :

1. Jiro, 3. Akte, 4. Kisüng,

5. Süngkü, 7. Maginü,

10. Limapur, 11. Antsük,

12. Anüshi, 14. Kula, 15. Naro.

NAI-A YA METETTER MA

West Indies nunger nüngtugu cricket asayar Kieron Pollard-i Honibarnü alizüng tasen ka tongteta pa ya T20 cricket nung run 14,000 yangluba tanabuba asayar kümogo. Caribbean Premier League 2025 nung Barbados Royals den Trinbago Knight Riders nungi asayaba mapang Pollard-i out mesüi run 19 yanglua iba alizüng tongteta liasü. Iba alizüng ya Chris Gayle kijai tongteter liasü. Arishi küm 38 tain all-rounder yagi asaya 712 nung run 14,000 yanglu. Gayle-i asaya 463 nung run 14,562 yanglur lir.

Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Mizoram CM-i central fund agi temulung asüba lemsatep

Aizawl, Luroi/August 30 (Agencies): Mizoram Chief Minister Lalduhoma-i Brihostibarnü ashiba agi, state nung terenlok mapa balala inyaksü atema Centre nungi senotsü aruba ajanga temulung asür.

Aizawl nung Mizoram Planning, Economic and Statistical Service Association indang conference ka nung o jembiba mapang Lalduhoma-i,

terenlok maparen balala inyaksü atema state sorkari Centre nungi sen telongjunga nguogo, ta metetdaksü.

Pai, Ministry of Development of North Eastern Region (DoNER) aser Special Assistance to States for Capital Investment (SASCI) kübok senotsü lemsütsüba ajanga terenlok tali jangja akümba indang tuteta ashi.

Chief Minister-isa, ketdangsürtem dang state nung alirongsen koba tajungtiba amshitetsü aji asadanger terenlok maparen koba tongtibangba iba dak rangloker inyaksü ajungshi.

Iba senden nung Chief Minister indang Planning and Finance Adviser aser MLA TBC Lalvenchhunga-ia shilem agia liasü.

Assam-i ozüng alema arur 33 Bangladesh-i meyipa yok

Guwahati: Assam Chief Minister Himanta Biswa Sarma-i, tawa ozüng alema arur 33 Bangladesh-i meyipa yokogo, ta Honibarnü metetdaksü. State sorkari ozüng alema arurtem maneni bushiteta oa meyipa yoktsü atema jenjang agidar.

Tesüiba ita trok tsüngda Assam nung ketdangsürtemi ozüng alema arur 1,200 shi meyipa yokba osang bushiteta lir, ta ketdangsütem-i metetdaksü.

Sarma-i, ozüng alema arurtem anema ajang ajanga nokdaka aliba X ajanga nenshia metetdaksüogo. "Ozüng alema arur 33 parnok talidak-

Bangladesh-i meyipa yokogo. Kümdangang: Onoki iba anema maneni jenjang tesashi agitsü aser tarutsü nung tesashiba benoka inyaksü," ta pai ashi.

Union Home Minister Amit Shah-i, Guwahati nung NDA indang Panchayat Sammelan mapang, Assam aser India ozüng alema arurtem nungi jenboa toktsütsü Centre sorkar bendanga agütsür lir ta ashiba sülen anogo ka lir CM-i iba osang metetdakja liasü.

Shah-isa, state-i ozüng alema aitba bendangertem puteta meyipa yoktsü atema Union aser state sorkar na longjemer inyakdar, ta

metetdaksü.

State sorkari ashiba agi, ozüng alema arurtem aliba ajanga state nütsünyongsük, sobaliba aser rongsenketzüng nung tetsüdaksü adoktsü. Ajisüaka opposition party tem aser rights teloktemi item nisungtem meyipa yokba ya aitsüogo aser ashiba agi, iba ya ozüng alema aser meimchir temeden anema lir. Parnokisa, iba inyakyim ajanga international human rights aser asylum protocols nung aibelener, ta ashi.

Taitsüba aika liaka Sarma-i aniba administration-i Assam ya ozüng alema arurtem nungi jenboa toktsütsü atema tanen makai inyakdar.

Mizoram nung sen crore 165 alang Meth tablets apu

Aizawl, Luroi/August 30 (Agencies): Mizoram nung Security force temi sen crore 165 dak tema alang methamphetamine tablets puogo, aser iba ken o dak sendakba nung nisung pongu pua lir, ta ketdangsürtemi metetdaksü.

Osang tejangja ka angazükba sülen mezügbuba meita aoba mapang Border Security Force (BSF) aser Narcotics Control Bureau (NCB) na senteper telok kati Brehostibarnü Serchhip jila anasa pickup truck ka sota liasü.

Ketdangsürtemi sen crore 144 alang methamphetamine (Yaba) tablets lakh 9.6 ngutet aser iba temesepba mozü shibelenba atema Aizawl nung alir asem pua liasü.

Kasa mapang nung Aizawl temeket nung tesem ka meita aoba mapang Assam Rifles aser Special Narcotics Police Station nungi sepaitemi Zemabawk South nung gari ka nungi sen crore 21 alangba meth tablets seret 7 ngutet. Ken o dak sendakba nung nisung ana puogo, ta ketdangsürtemi metetdaksü.

Auguts 21 nü BSF, NCB, aser Mizoram Excise & Narcotics Department nunger longjemer Aizawl-Champhai highway (NH-6) nung tesem kar meita aoba mapang sen crore 75 alang meth tablets lakh 5 aser heroin gram 36 apuba sülen maneni sepaitemisa tesem balala nungi temesepba mozütem puogo.

Meita aoba sentong balala ayongzüka agiba mapang temesepba mozü shibelenba nung densema aliba nisung ti aser parnoki amshiba gari pezü puogo.



Guwahati nung Protection of Children from Sexual Offences (POCSO) Act kübok tai tonglokja aliba nisung ana, Assam nung Morigaon district jail nungi jena ao, ta Karnataka kubok Chikkamagaluru district nung bushisüngdangogo aser apu, ta police-i ashi. Tesulen aija alirtemji Assam ketdangsertem ket nung agütsüba noksa nung angur.

Trump indang tariffs timba ozüing alema lir: US Court of Appeals



New York, Luroi/August 30 (Agencies): Hokulbarnü US appeals court kati Donald Trump indang tariffs timba ozüing alema lir ta obendang agütsü, anungji Republican tiri international economic policy indang hadir ama tariffs amshiba tashi mait kumdaktsür. US Supreme Court nung appeal benoktsü asoshi Trump administration nem maongka agüja court-i iba tariffs ya October 14 tashi alitsü melar.

Federal Reserve kecha agia talenba malitsü asoshi raraba Supreme Court dangi aotsü ama mapang ka nung iba telemtetba ya agir, anungji taküm Trump indang economic policy ajunga nung tzüzüing-ozüing tsütsü tetsükdaktsü ajurur.

Trump-i pa kümsük tanabuba nung tariffs ya US foreign policy indang tongshi ka ama kumdaktsü aser itemji amshia United States nung osettsüset bener arua ayokba linüktem nem political pressure agüja aser trade deals jembishir.

Tariffs ajanga Trump administration-i trading partners nungi rongsenketzüing tsütsü tajangzüik agir, saka financial markets yimya takzütsü makokba tali akumer.

Party telemsa kanga jangjaba court kati telemtetba agiba atema sasar, ta Trump-i ashi. "Item tariffs ya agienra, ibahi linük asoshi khenyongi lendong asütsü" ta pai Truth Social nung lemsatep.

Ajisüaka Supreme Court teyari nung tariffs yagi linük ajangzüiktsü imlar, ta pai ashi.

Washington, D.C. nung aliba U.S. Court of Appeals for the Federal Circuit nungi iba

telemtetba ya 7-4 ajanga agia liasü, kong Trump-i April ita "reciprocal" tariffs meshiba aser China, Canada aser Mexico anema February ita tariffs balaka meshiba indang jembia liasü.

Court telemtetba yagi Trump indang steel aser aluminum imports amala nung tariff meshiba nungbo mekokshitsü.

Trump-i tariffs tabu anaprong aser tang tesüsa meshiba ya International Emergency Economic Powers Act kübok mela lir ta ashir. IEEPA yagi national emergencies mapang tetei ama masü aser lendong alakyia balaka ajuruba koktettsü asoshi tir nem tashi agüja lir.

"Statute yagi sangdonga aliba national emergency nung telangzüba agüja mapa aika inyaktsü Tir nem tashi agüja lir, saka item inyakyim ya kata nunga tariffs, duties mesüra iba ama mesüra power of tax meshitsü tashi mali," ta court-i ashi.

"IEEPA yangluba nung Congress-i tesüiba mapang inyaka aruba ama masütsü aser Tir nem tariffs meshitsü asoshi talenba makai tashi agütsüba memesük," ta ashi.

1977 küm yangluba ozüing ya akhi mapang nungi tsükchir nem temerenshi agütsüba mesüra parnok indang rongsen soita ayuba nung amshia aru. Tariffs benoktsü atema IEEPA ya Trump-i mezüing amshi aser shishilempaba tsütsü lirumedem masüba, US manufacturing powers ajema akumba aser arütsü alema temesepba mozü aitba mechi iba mera ya agitsü nüngdaker ta ashi.

Trump indang Department of Justice ajanga ashiba agi, iba ozüing yagi emergency provisions kübok tir kati imports azioktsü mesüra nokdangtsü tashi agütsür.

US imports ya exports dang tali asüba mechi April ita Trump-i national emergency ka sangdonga liasü. Shishilempaba tsütsü tanen makai sentsü atsüba ajanga US manufacturing capability aser mitkar renema alitsüba tsütsü tetsükdaktsü ajurur, ta Trump-i ashi.

February ita China, Canada aser Mexico linüktem anema tariffs sangdongba ya tim mapa lir, kechiaser item linük yagi US arütsü alema fentanyl bener aiba anendaktsütsü asoshi peria mapa meinyaker ta Trump-i ashi, koba linük asem yagi magizüker.

6-3 agi conservative pur timba aliba Supreme Court ajanga Trump kümsük tanabuba agenda bhukuma obendang aika agüja lir, saka tir nem tashi tasen tem agütsüba indang teratetba tali akuma nung parnoki memulunger.

Appeals court obendang ya ken o ana nungi tenzüik, ka US businesses tila pongu nungi benokba aser ka ya Democratic Party-i anir aliba US states 12 nungi lir aser IEEPA yagi tariffs atema temelaba agüja mali ta parnoki nokdaker.

Constitution yagi taxes aser tariffs meshitsü tashi ya tir nem masü Congress nem agüja lir, ajisüaka iba tashi ya kanga telatet lir.

New York nung amenoka aliba US Court of International Trade-i Trump indang tariff policies anema May 28 nü obendang agütsü aser tir-i tariffs tabu ana benokdang pa indang tashi alema oa inyak ta ashi. Obendanger asem aliba panel nungya ka Trump-i pa mezüing kümsük mapang shimba lir.

Washington nung aliba court katia IEEPA yagi Trump indang tariffs memelar ta obendang agüja lir. Trump indang tariff policy anema ken o ti tashi benoka lir, aser item rongnung California state-i benokba ka densema lir.

Indonesia nung longkak aiteri regional parliament nung mi senloktsü



Indonesia nung longkak aiteri regional parliament nung mi senloktsüba noksa nung angur

Jakarta, Luroi/August 30 (Agencies): Indonesia nung longkak aiteri temi Makassar nung aliba regional parliament ki ka nung mi senloktsüba sülen nisung asem asü aser pongu yiru, aser iba mepetmesü ya Tir Prabowo Subianto'er sorkar asoshi tetendangba mezüingbuba ka asütsü.

South Sulawesi indang provincial capital nung nüburtem ki telungi nungpoka aiba sülen kitsük-kirong lendong ya atalok. National Disaster Management Agency ajanga ashiba agi, nisung ana mi nung asü aser ana ki telung nungi pongzüikba sülen yiru. Mi jangrua aoba mapang nisung kar ki telung nungi madokteti asü, ta Indonesia sorkar meyong Antara news agency ajanga ashi.

Ozüing yanglurtem indang allowances mechi nüburtem yimtongi adoka Jakarta nung mepetmesü ya hopta tetenzüklen nungi liasü. Indonesia yimtiba nung Hokulbarnü longkak aitba mapang police armoured vehicle kati motorcycle taxi driver ka tsüksetba sülen tensa kanga mejungi akum.

Taoba October ita nung tir akumsang Prabowo-i Hokulbar aonung asür kibong semdanga liasü. Pai tsürabur den asükhu lemsatep aser iba tatalokba pai ketdangsüa bushisüingdangtsü nangzüka liasü.

Jakarta tesem kar nung rakzükraktemba osanga lir, aser iba yimti nung transport facilities kar raksatsü. Bandung aser Yogyakarta nunga longkak aiter, anungji nüburtem mepelaba sayur.

Jakarta indang mass rapid transit operator ajanga ashiba agi Honibarnü train tem longkak aitba tesem anasa station ka paidoka ao aser iba tesem nung Transjakarta buses tem khen atema soita lir.

Indonesia police aser mitkar temi telangzüba tesashi agütsütsü nangzüka lira ser Tir Prabowo Subianto-i "anarchic acts" anema mera teashi agitsü totuyuba agütsüogo, ta National Police chief Listyo Sigit Prabowo-i Honibarnü ashi.

Nüburtem nem 'right to expression and assembly' agüja lir, saka tang region balala nung longkak aitba yagi ozüing nung aibelener, ta Listyo-i ashi.

Israel merenshitsü EU linüktem melungjemteter

Copenhagen, Luroi/August 30 (Agencies): European Union indang humanitarian aid chef-i Gaza nung nisung asüba, ki o jen raksatsüba aser nisungi yasa-tzüradaktsüba nung bloc tamendakba sayutsü lenmang bushia ola tulu adoktsü ayongzüikba sülen iba bloc indang foreign minister temi Israel-i kin samatsütsü meranga Gaza nung raraba mechi mera agitsü atema tangatettep kati maruteter.

EU züngsem linük 27 nungi minister tem rara indang jembitsü asoshi Denmark yimtiba Copenhagen nung Honibarnü adenshia lir.

Parnoki Israel nunger start-ups nem EU-i senotsü teyari agütsüba anentsü asoshi onük jembitsü. Ajisüaka parnoki iba mera agitsü nüngdakba ama opang mapur, anungji Israel anema tashiyim mapa tali inyaktsübo tamakoktsü.

Spain aser Ireland ama züngsem linük temi Palestine nunger merenshia amakba anentsü asoshi Israel kanga sashia ajungshiner, saka Germany aser Hungary ama par tembar linük temi memulunger.

Gaza asoshi EU-i kecha meinyaker, ta Spain indang Foreign Minister Jose Manuel Albares-i iba senden amentsü lia osangnener dang ashi.

Honibarnü Denmark Foreign Minister Lars Lokke

Rasmussen-i ashiba agi, nisung meimchir asoshi timtem tulutiba asenoki angur. "Israel-i yimya melenshitsüla. Tangatettep kati arutsüla. Association agreement nung Denmark-i trade chapter anentsü aser (Israel Ato Kilonser Benjamin) Netanyahu sorkar aser par sorkar nung minister kar nem temerenshi agütsütsü renema lir," ta pai ashi.

"Ni teimla kangabo mangur aser tanü onoki telemtetba ka magitettsü. Ibaji ajanga asenok tsüingta telemsa aliba sayur," ta EU foreign policy chief Kaja Kallas-ia senden mamendang ashi.

Israel indang rara aser talisa civilian tem asüba aser humanitarian aid nokdangba atema EU sorkar aikati kanga sashia aitsür.

United Nations aser aid agencies Integrated Food Security Phase Classification (IPC) ajanga Gaza nung ayawara lir ta taoba hopta sangdongba sülen Israel anema ola tali adoker.

Ajisüaka EU züngsem linük tem külemi telangzüba agütsütsü asoshi sadanger lir, kong kari Israel ajungshia rongsenketzüing tsütsü mera agitsü ajungshir aser kari jembishinü akatsü tejangraba lir.

EU foreign minister temi Ukraine nung rara indanga jembitsü imlar.



European Union foreign minister tem Copenhagen nung Honibarnü senden ka amendang tangokba noksa nung angur.

US Open: Alcaraz, Sabalenka nati pei tata asaya kokogo



Carlos Alcaraz



Aryna Sabalenka

Luroi/August 30, 2025 (Agencies): Hokolbarnü US Open nung Carlos Alcaraz aser Aryna Sabalenka nati pei tata asaya koka round round of 16 tongtetogo.

Spain nunger asayar Alcaraz-i 32nd seed Italy nunger asayar Luciano Darderi ya 6-2, 6-4, 6-0 agi ghonda ka ser minute 44 nung dang koka liasü. Alcaraz, shibai iba asayamung ya 2022 küm koker lir, pai Darderi form dangi arua asayatsü maongka magütsü aser asaya tetenzük nungi tatembang tashi amokbanger asaya liasü.

Iba asaya akokba sülen pa Deobarnü France nunger Arthur Rinderknech den asayatsü, shibai külem France nungersa Benjamin Bonzi 4-6, 6-3, 6-3, 6-2 agi kokogo.

Asaya nung tanabuba set asayaba mapang 5-4 alidang

Alcaraz temekok tachichilen anepalutsü atema mapang tatsüka agia liasü. Ajisüaka mapang tatsüka lir pai fan aser osangbenertem dang dang taoksatsü mali ta shiogo.

Tebur kija asaya nung America nunger Ben Shelton bo yiruba ajanga asaya tembanga masayateti tsükogo.

Shelton aser France nunger Adrian Mannarino na asaya nung 6-3, 3-6, 6-4 agi Shelton tejakdang sür asaya aliba mapang pa tapu nung timtem adoka masayatettsüsa aküm. Temang anepaluba sülen pai asayatsü merang saka mekoki tuguatok.

Maneni America nunger fan tem atema tezüdangtsüka Frances Tiafoe-a Germany nunger asayar Jan-Lennard Struff-i tsükdaksüogo. Struff-i iba asaya ya 6-4, 6-3, 7-6 (9/7) agi koka liasü.

Czech nunger Jiri Lehecka-i iba asayamung nung maneni kanga junga asaya Belgium nunger Raphael Collignon 6-4, 6-4, 6-4 agi kokogo aser round of 16 tongtetogo.

Kasa asayamung tetsür kija asaya nung world number one Aryna Sabalenka-i Canada tsür Leylah Fernandez koka round pezübubai iogo. Louis Armstrong Stadium nung lai iba asaya 6-3, 7-6 (7/2) agi ghonda ka ser minute 39 nung koka liasü.

Tetsür kija asaya nungsa America tsür fourth seed asayar Jessica Pegula-ia 6-1, 7-5 agi Victoria Azarenka koka round of 16 tongtetogo. La taruba asaya America tsürsa Ann Li den asayatsü.

Ajisüaka Belgium tsür Elise Mertens bo Spain tsür Cristina Bucsa-i 3-6, 7-5, 6-3 agi tsükdaksüogo.

Alexander-Arnold England team nung mezüngok



Trent Alexander-Arnold

Luroi/August 30, 2025 (Agencies): Thomas Tuchel indang England squad nung Trent Alexander-Arnold züngoksema mali, ajisüaka Elliot Anderson aser Djed Spence na tang mezüngbuba team nung züngoksema.

Right-back Alexander-Arnold, shiba taküm Liverpool nungi Real Madrid-i ao, pa Tuchel indang taoba squad nungbo züngoksema liasü.

Ajisüaka pa Andorra aser Serbia na den asayatsü aliba World Cup qualifiers indang squad nung densema mali.

Arishi küm 26 tain asayar Alexander-Arnold ya Real Madrid puri goal 3-0 agi Real Oviedo akokba asaya nunga mezüng nungi masayai liasü.

Nottingham Forest midfielder Anderson aser Tottenham full-back Spence na tang mezüngbuba team nung züngoksema, ajisüaka Everton winger Jack Grealish bo zütokogo.

Marcus Rashford aser Adam Wharton na maneni shimogo aser Morgan Gibbs den külemi arishi küm 35 tain Jordan Henderson maneni team nung züngoksema. Tuchel lenisüba nung England team pezüben asayar lir aser asaya asem nungbo Henderson asayaogo.

Ajisüaka Kyle Walker aser Ah-Ahli striker Ivan Toney naprongla meshim. Tuchel-i coach mapa agizükba sülen Tino Livramento tang mezüngbuba team nung aniokogo.

Kasa mapang nung Real Madrid midfielder Jude Bellingham, Bukayo Saka, Cole Palmer aser Levi Colwill nunger ajak yirur lir.

England team Andorra den September 6 nü Villa Park nung asayatsü. Parnok ya FIFA world rankings nung jenjang 174buba nung lir.

Iba sülen Tuchel-i aniba England team ya September 9 nü Belgrade nung oa Serbia den asayatsü.

England team-i June 10 nü Senegal den friendly asaya goal 3-1 agi makok saka Group K nung England team-i asaya asem nung asemprongla koka parnok temaba jenjang nung lir. England squad:

Goalkeepers: Jordan Pickford, James Trafford, Dean Henderson

Defenders: Reece James, Marc Guehi, John Stones, Dan Burn, Ezri Konsa, Myles Lewis-Skelly, Tino Livramento, Djed Spence

Midfielders: Elliot Anderson, Morgan Gibbs-White, Jordan Henderson, Adam Wharton, Morgan Rogers, Declan Rice

Forwards: Harry Kane, Eberechi Eze, Jarrod Bowen, Anthony Gordon, Noni Madueke, Marcus Rashford, Ollie Watkins.

World Championships: Satwik-Chirag na semifina-i iogo

Luroi/August 30, 2025 (Agencies): India nunger nüngtugu tebur tarep badminton asayar Satwiksairaj Rankireddy aser Chirag Shetty nati tang asaya aliba World Championships quarterfinals nung Olympics anaben tashi koker aliba Malaysia nunger tarep Aaron Chia aser Soh Wooi Yik na kokogo

Küm ka tejakdang Paris nung Olympics asayaba mapang quarter final nung Rankireddy aser Chirag nati

Malaysia nunger tarep ya mekoki temulung raksar tembanga sülen tang iba asayamung nungbo tenati Hokolbar aonung menor 21-12, 21-19 agi asaya kokogo. Tarep ana tsüngda minute 43 asayba sülen Rankireddy aser Chirag

nati asaya koka taoba küm tamakok anguba mang yangogo aser semifinal tongtetogo.

"Asaya akokba atema kanga pelar. Iba asaya ya taoba küm Olympics asaya asayashiba ka liasü. Taoba küm asayaba kasa court aser arena nung asayaogo. Olympics nung asayaba sülen tang World Championships nung asayar," ta Chirag-i asaya tembanga sülen ashi.

Tena semifinal nung China nunger 11 seed tarep Chen Bo Yang aser Liu Yi na den asayatsü.

India nunger tarep yagi tena toba küm Thailand nung khen asayaba mapang kokogo, saka tena atema asaya melara masütsü.

Newcastle-i Woltemade pound million 69 agi alizükogo



Nick Woltemade

Luroi/August 30, 2025 (Agencies): Newcastle United-i club atema otsü tasen ka yanglua Stuttgart nungi striker Nick Woltemade alizükogo. Pa den küm trok atema tenangzüktepba yangluogo.

6ft 6in (1.98m) talang arishi küm 23 tain Germany nunger international asaya ya pound million 69 agi Newcastle nung denogo.

Küm asem tejakdang Newcastle-i Alexander Isak atema pound million 63 agüja pa ya club-i sen tasaktiba agi alizükba asayar liasü, saka tang Woltemade-i pa ajateta club nung sen tasaktiba agi alizükba asayar kümogo.

Woltemade, shiba number 27 asemtsü, pa Honibarnü Leeds United denbo masayatettsü, kechiyong pa mapang shitak nung mezüngoksem.

Ajisüaka asayayonga aoba mapang Woltemade-i shilem tulu ka agitsü nüngdaka lir, kechiyong Isak tarutsü mejangjai lir, shiba Liverpool nung adentsü mulungteter lir.

"Ni iba amala club tajung ka nung adenba atema kanga pelar. Mezüng tongtepratepba

mapang nungi club-i ni kanga aginüba aser kü atema sentong tulu aliba jangja aküm," ta pai ashi.

"Kü taküm nung Germany toktsütsü atema iba ya jenjang tulu ka lir, saka ajaki ni kanga pelashishia agizükogo aser kibong ka ama dang bilemer. Ni head coach den jembiba sülen ni tajungtiba asayatettsü atema iba ya kü atema club tapet asütsü ta jangja aküm.

"Television nung asaya repringba ajanga ni stadium ya meteta lir aser jangrademtsüka lir. Ni asaya tenzuka goal idaktsütsü yongya atar," ta paisa ashi.

Kasa mapang nung Newcastle United head coach Eddie Howe-i, "Nick-i kanga kara tenangzüktepba yangluba atema pelar. Attack nung teyari agütsütsü atema pa ya onoki bushia aliba asayar ka lir," ta ashi

"Pa lenla aika nung kanga tashi tait. Pa dak sempet tajung aika lir, koba pai Europe nung temaba jenjang nung asayaba league tem nung sayuogo. Kasa mapang nung pa ano renloka aotsü lenmang sadema lapoka lir.

BILEMDANGANG

"Shibai tematiba jenokdak alir pai ajak takoksang akümpok nung alitsü."